

# Kebab, pendicularas e Tuatschins sut la marella

La Dertgira nauscha ha salvau sia seduta el center dil vitg da Mustér

■ (anr/hh) A Mustér s'auda la sera dil gliendisdis tscheiver pli u meins alla Dertgira nauscha. Tschiens vischins e hosps da vacanzas seradunan el vitg per tedlar las sentenzias. Uonn ein oravontut ils fatgs turistics ed ils Tuatschins vegni sut las rodas. «Turzegiar e divertir» ei il motto dalla Dertgira nauscha. Ed ella vesa sesezza schizun sco davosa istanza: «Ils cass che vegnan tractai questa sera san buca vegnir tratgs vinavon. Il sulet che vus saveis far ei ir a casa tier la mumma e bargir.» Era ier sera ei la dertgira suandada ses principis, tractond differents cass difficils digl onn vargau e sentenziond ils delinquents e culponis.

## Kebabs dat ei avunda

La Dertgira nauscha ha priu sut la marella differents schabetgs digl onn vargau enteifer la vischnaunca da Mustér. Aschia ha ella intervegniu ch'il Coop vul realisar in niev center el territori da Sax. Ils derschaders cusseglian al detaglist da planisar ils parcadis avon che baghegiar x-enzatgei. Allas votantas ed als votants appellescha ella da tener stendiu quei che pertucca il hotel Acla da Fontauna: «Finalmein has in tafer pèsch vid la lontscha. Tschappa, tegn e tila la preda alla riva.» Mo era il niev kebab el center dil vitg metscha buca senza ina remarca. Ils derschaders constateschan ch'il niev bistrot sesanfla en buna cumpignia, leu nua ch'ei dat capuns e carn muntaniala. Quei tenor il motto: «Sch'ti has da capuns e bizochels avunda, buca panza – kebabs dat ei avunda.» Naturalmein che la Vusch04 ei era stada in tema, aschi-bein sco il comeback dils Furbazs e la fin dalla gruppa Maconga.

## Romontsch – mo rontsch

Sco mintg'onn ein era las pendicularas stadas uonn sin gliesta da tractandas dalla Dertgira nauscha: «Schizun in teppi per ils marschs han ei ussa si Caischavedra. Aber sch'ei ha memia bia marschs sil teppi per marschs, vegn il teppi era marschs e marscha buca pli. Tgei schmarschem.» Sut las rodas vegnan era las novas bandieras da reclama da Sedrun Mustér Turissem. La dertgira constatescha che quellas pendan en negina successiun logica arisguard lur color. Pli-navon sappien ins leger il logo ina ga da quella ed ina ga da tschella vart. Ils derschaders smarveglian che las bandieras pendan buc aunc cul tgau engiu. Causas brisantas sa ella era comunicar davart il diever dil romontsch. Fertion ch'ei eri scumandau pli baul mo da patertgar en in auter lungatg a Mustér, seigi ei oz schizun lubiu da far placats per tudestg. Tonaton constatescha la dertgira ch'il tudestg vegn applicaus stediamein en l'entira Surselva, seigi per exempel tier l'aurax ni era autras fatschentas.

## Sfoss da capuns...

In tema dalla Dertgira nauscha ein las discussiuns en connex cun Sedrun Mustér Turissem staus. Las midadas e las differenzas denter ils dus loghens da turissem digl onn passau ein naturalmein stadas sco aua sils mulins. «Autras regions han in Röstigraben e nus vein in sfoss da capuns.» Tonaton anflan ils derschaders era laud pils vischins tuatschins: «L'oasa da wellness ei gartegiada stupent. Mo tier mintga oasa s'audan era camels. Ils camels da loian rimnan suttascripziuns encunter far sauna

bluts.» La Dertgira nauscha propona la suandonta soluziun: «Tut quels che ein vegni cun resti sil mund, astgan ir a far wellness cun resti.» Sut las rodas vegnan era ils pumpiers da Tujetsch. Quels da Mustér hagian stuiu segidar pliras ga, schizun per in barschament d'in tschetschapuorla stoppien ins quintar da stuer serender dalla Val en proxima-mein. Ed in appel drezza la dertgira als iniziants dalla Porta Alpina. En cass che quella vegness realisada, stuessen ils Tuatschins numnadamein buca carrar pli atras Mustér per ir ora el mund: «Porta Alpina, fai che nus vein ruaus da quels da Tujetsch – per adina.» La fin finala ei era la sentenza finala stada drizzada enviers vest. La decisiun dalla Dertgira nauscha: «Igl ei quels che tragan ch'els seigien megliers che quels da Mustér. Igl ei quels cun las oasas ed ils camels. Igl ei quels ch'ei in buc el stan da stizzar il fiug. Igl ei quels da loian. Vid la fuortga cun Sedrun.»